

禮

記

通

解

禮記通解卷五

郝敬習

王制第五

王制漢文帝時博士所撰也。古帝王之法。至周大備。周東遷而文武典章壞。孔子不得在位。脩六籍以詔來許。旋經七國大亂。處士橫議。再更秦紀。彝教衰殘。至漢而孔氏遺書盡矣。文帝世天下初定。始除挾書律。學士大夫相與收拾遺文。補緝舊編。一縷之緒。彷彿希微。耿耿唯寸靈焉。千古耳。孟子生周末。距孔子所纔百有餘歲。其詳已謂不可得聞。況暨劉漢五百。

年之後乎。故先儒謂王制不必句句求解。然以僅存之緒。復不求解。則思考古人制作之意。末由也已。但真屬可否。貴學者自得。如鄭康成輩。輾轉傳會。好信不通方。則無謂耳。

王者之制。禘。爵。公。侯。伯。子。男。凡五等。諸侯之上大夫。卿。下大夫。上士。中士。下士。凡五等。天子之田。方千里。公。侯。田。方百里。伯。七十里。子。男。五十里。不能五十里者。不合於天子。附於諸侯。曰附庸。天子之三公。之田。視公。侯。天子之卿。視伯。天子之大夫。視子。男。天子之元士。視附庸。制農田百畝。百畝之分。上農夫食闕九人。其次食八人。

其次食七人。其次食六人。下農夫食五人。庶人在官者。其祿以是爲差也。諸侯之下士視上農夫。祿足以代其耕也。中士倍下士。上士倍中士。下大夫倍上士。卿四大夫祿。君十卿祿。次國之卿三大夫祿。君十卿祿。小國之卿倍大夫祿。君十卿祿。次國之上卿位當大國之中。中當其下。下當其上。大夫小國之上卿位當大國之下卿。中當其上。大夫下當其下。大夫。其中有中士下士者。數各居其上之三分。

制祿爵。猶孟子言班祿爵也。公者無私之名。其德公平也。侯。侯也。天道以五氣爲侯。王者以列辟爲侯。侯。

王者爲順逆也。伯長也。或曰伯白也。明白於德也。子  
慈養之名。男任事之名。此五等爵之班於天下者也。  
諸侯者。公以下五等之通稱。其臣各有卿大夫士大  
夫貴者曰卿。卿嚮也。人所歸向也。下大夫對卿爲下  
也。大夫者。達人扶達於人也。士事也。任職事也。此五  
等爵之班於列國者也。田卽地也。穀祿所出。故曰田。  
天子畿內之田。四方各千里。開方則百萬里也。畿外公  
侯之田。四方各百里。開方則萬里也。伯田四方各七  
十里。開方則七七四千九百里也。子男四方各五十  
里。開方則五五二千五百里也。下此或四十里。三十

里國小不能朝會以其治功附於所近大國達王名曰附庸庸功也此祿之班於天下者也天子之公卿大夫士之祿卽天子畿內之地分授以爲采邑三公視外公侯各百里九卿視外伯各七十里大夫視外子男各五十里元士視外附庸或四十或三十里此祿之班于王畿內者也又其下有庶人在官者雖無爵而身在公不得耕必與之祿代耕卽以其耕之所獲爲等蓋民一夫田百畝而力有勤惰歲有豐儉大約五等上農一歲之入可食九人次食八人次七人次六人次五人庶人在官者事有繁簡祿有多寡亦

視此爲等。蓋一夫上父母，下妻子，大率五人至九人而止，所以足其俯仰之需，使無內顧之憂也。此在官庶人之祿。王國與諸侯同者也。諸侯之臣各有卿大夫士，而下士祿最薄，視上農食九人，僅足以代耕。中士則加倍，可食十八人。上士又加倍，可食三十六人。大夫又倍上士，可食七十二人。此大國之制。次國小國同也。蓋自大夫以下，其祿漸少，苟復以次國小國殺之，則臣之養不給矣。故三等之國同也。大國之卿祿視大夫四倍，其君公侯之祿視卿十倍。蓋以下士食九人之數等而上，推至卿祿可食二百八十八人。

是四倍大夫也。其君百里之入可食二千八百八十人。是十倍卿也。惟大國然耳。若夫次國卿祿但三倍大夫不得如大國四倍也。其君伯之祿雖亦十倍卿。然其卿視大國卿已殺一倍。而其君七十里之入亦視百里殺一矣。小國卿祿但二大夫又不得如次國三倍也。其君子男之祿雖亦十倍卿。然其卿視次國已殺一倍。則其君五十里之入亦視七十里殺一矣。此卿以上之祿三等之國異也。蓋祿至卿以上愈厚。若次國小國不殺則地所出不給。是故三等之國異也。此以上皆祿之班于侯國者也。次國之上卿以下。



又詳言爵之在侯國者各有上中下卿上中下大夫  
次國卿大夫視大國卿大夫皆降一等小國卿大夫  
視大國皆降二等其有中士下士二句錯簡當在後  
三節小國上士二十七人之下承上言上士二十七  
人未及中下士而申明其數也各居上三分者上士  
二十七人居三分則八十一人也

按王制作于漢博士其說宗孟子而加附會孟子謂  
天子公侯伯子男五等諸侯卿大夫上中下士六等  
今不以天子列于五等者尊王也不以諸侯列于六  
等者尊君也然非先王與羣臣共天下之本心孟子

謂天子之卿大夫士祿比諸侯而周禮謂天子公卿大夫皆加一等然後得爲諸侯孟子謂諸侯大國止于百里而周禮大國諸公地方五百里諸侯地方四百里伯三百里子二百里男百里是爵五等而地亦五等也而周書武成云列爵惟五分土惟三武成雖非古而此語與孟子合必有所受之則是周禮未足據也此篇前云諸侯之上大夫卿下大夫上中下士凡五等後又云上卿中卿下卿上大夫下大夫則是五等中又加三等爲八因春秋傳臧宣叔對魯公語采輯故前後抵牾而鄭氏緣聘覲附會之大

有言 卷三  
抵王制左傳周禮皆成於後人手惟孟子近古可信  
且生周末猶自謂其詳不可得聞未知漢博士何据  
而反得詳也若夫周禮出自王莽家劉歆之見烏得  
與孟子較同異論得失乎

凡四海之內九州州方千里州建百里之國三十七十  
里之國六十五十里之國百有二十凡二百一十國名  
山大澤不以封其餘以爲附庸開田八州州二百一十  
國天子之縣內方百之國九七十里之國二十有一五  
十里之國六十有三凡九十三國名山大澤不以封  
其餘以祿士以爲開田凡九州千七百七十三國天子

之元士諸侯之附庸不與天子百里之內以共官千里之內以爲御

四海之內九州各方千里內以一州爲王畿外八州每州各建公侯之國三十伯國六十子男國百有二十其間名山如五嶽四鎮之類大澤如雲夢彭蠡之類屬之王府不以封諸侯其餘地以爲不能五十里之附庸與士之間曰天子之縣卽王畿也縣繫也凡邑屬州郡者曰縣縣內猶言屬下畿內分三等之國爲王臣采邑九十有三其餘十有八國皆以待王分封通計九州之國共千七百七十三而元士附庸不

與者以所計止五十里而元士附庸不能五十里故  
不與也百里之內以供百官者百官之入薄故予之  
近地便取給也千里之內以爲御者天子服用費廣  
遠可轉輸致也

按春秋傳楚滅陳爲縣縣名自此始秦以來凡邑屬  
郡者通謂之縣惟周禮謂郊外五鄙爲縣鄭康成遂  
推縣爲夏世王畿名無稽封建之數漢博士以算法  
推之當爾非實然也鄭極其附會謂百里大國九者  
內三爲三公致仕之田餘三爲封王之子弟次國二  
十一者內六爲六卿之田又六爲六卿致仕者之田

又三爲三孤之田。餘六亦待封王子弟。小國六十三者。二十七大夫之田。及大夫致仕者之田。餘九亦待封王子弟。總之臆說耳。凡建國必因山川形勢。未有舉九州地。如裂帛方幅。比算整齊者。天子千里之縣。分封過半。又除山林川澤城郭塗巷溝渠其餘任賦。供上者幾何。三等十八國以待分封。如文武子姓多。則一再傳盡矣。數世後何以給之。及舛迕不合。則推爲殷夏禮。據周禮九服地甚廣。禹貢三代地莫廣于虞夏。而周爲小篇末。謂西不盡流沙。南不盡衡山。東不盡東海。北不盡恆山。截長補短。三千里耳。周禮成

於後世九服六千之說由秦以後北逐匈奴南置桂林象郡西逼巴蜀幅員始大記與周禮皆據秦漢以後揣合周制非周地能大于殷夏也卽塗山之會萬國亦極言諸侯會者多非真萬國也周千七百七十國因九州之地揣算非真文武封建時定有此數也況如周禮五等之國公多至五百里而子亦百里四海之地不足封數十公侯殆盡王畿僅千里欲視外諸侯授諸臣地愈不足其說不經而世儒執此謂先王封建壞于郡縣古今治亂所以不相及夫古不能不今封建不能不郡縣勢也三代以封建治春秋

戰國之亂未嘗非封建也。秦以郡縣滅漢唐以來之盛未嘗非郡縣也。謂封建不可不復漢復之而七國反謂封建不可廢漢唐至今廢之而天下亦治以封建爲公則周之子孫功臣世祿而士如孔孟不得占尺土未盡公也。以郡縣爲私懸天下之伯牧守令待天下士明一經者得占一郡一邑未盡私也。大抵爲政在人人存則舉有先王爲君則雖郡縣守令而時使薄斂卽封建也。如幽厲爲王春秋六國爲諸侯而言封建長寇資盜不如郡縣之爲便矣。不權古今不量時勢守記籍空文欲壞久定之成法以復久廢之



禮記通解 卷三  
堊典如鄭氏之說可資譚柄不可爲實用百里內以  
供官則不足千里內以爲御則太侈亦非典要之論  
周禮大宰九賦九式太府頒財之法皆與此不合關  
市邦中四郊之近以待御而官田公田俱在遠郊六  
遂都疆之外與王制矛盾故凡禮家言紛紛杜撰難  
盡據也

千里之外設方伯五國以爲屬屬有長十國以爲連連  
有帥三十國以爲卒卒有正二百一十國以爲州州有  
伯八州八伯五十六正百六十八帥三百三十六長八  
伯各以其屬屬於天子之老二人分天下以爲左右曰

二伯千里之內曰甸千里之外曰采曰流

千里之外謂王畿外八州諸侯之國遠不相及故爲  
統馭之制方伯卽八州之伯各主其州一方者也凡  
五國爲一屬屬繫也內擇諸侯賢者一人爲長言仁  
能長人故能繫屬也倍五爲十國地廣易睽爲連內  
擇一賢侯爲帥言知能帥人故能連合也又三倍爲  
國三十地愈廣人愈衆曰卒卒簇聚也於內擇一賢  
侯爲正言義能正人則整齊不亂也長與帥與正無  
以總之則其權分彼此不相維其勢渙能否無由察  
又合一州二百一十國擇一賢侯爲伯伯把也把持

一方之柄也。一州一伯，八州則八伯，一州七正，八州則五十六正，一州二十一帥，八州則百六十八帥，一州四十二長，八州三百三十六長，各上統于其州之伯，八伯各以所屬上屬于天子之老，二人，二人者分天下而治為左右二伯者也。猶周禮所謂九命作伯，蓋天子之上公，曲禮謂五官之長曰伯，是職方者也。八伯猶周禮云八命作牧，曲禮所謂九州之長入天子之國曰牧者也。或云二伯即方伯，然既曰千里之內，外設方伯，是與天子之二老在內者殊也。千里之內曰甸，即天子畿內千里之地也。甸，佃通，治田之名。禹

貢所謂甸服納總銍秬粟米之地居五服中者也采  
事也環王畿外千里禹貢所謂侯服綏服采地男邦  
諸侯揆文教奮武威之地居中外之間者也流遠方  
去王畿五千里環侯綏外禹貢所謂要服荒服夷蠻  
之地蔡放罪人在五服邊徼外者也禹貢五服四方  
相距各五千里而王畿居中央采居間流居外三名  
者約五服而言也方伯連帥之所統二伯之所分治  
盡此矣

按牧伯詩書有之二伯之說沿於詩周南召南春秋  
傳謂陝以東周公主之陝以西召公主之書顧命亦

云召公左畢公右而連帥卒正等詩書未聞大抵多縱橫什伍之意管子內政商君秦法皆倣於此雖先王綱紀天下輕重制馭大小相維體統不廢要其所以整齊聯屬之本姑不在官制之繁密也善稱先王莫如孟子其告滕君惟井田學校告齊梁惟田里畝畜與文王治岐之政數條而井田尚云大畧爵祿尚云不詳豈有先王法制詳密如此漢博士能舉孟子反不聞乎今據二伯以下爲諸侯之長者五百七十七統九州諸侯一千七百七十三國鄭猶以爲殷制然則周尤多乎果爾文武去東遷未遠春秋所記東周

諸侯纔二十餘國，不應幽厲以後兼併，盡五百七十  
伯正帥長，姓氏二千有餘國，號悉煙滅，無傳也。其無  
此數必矣。

天子三公九卿二十七大夫八十一元士，大國三卿皆  
命於天子，下大夫五人，上士二十七人，次國三卿二卿  
命於天子，一卿命於其君，下大夫五人，上士二十七人，  
小國二卿皆命於其君，下大夫五人，上士二十七人，天  
子使其大夫為三監，去聲監平聲於方伯之國，國三人，天子  
之縣內諸侯祿也，外諸侯嗣也。制三公一命卷，聚若有  
加則賜也，不過九命。次國之君不過七命，小國之君不

過五命。大國之卿不過三命。下卿再命。小國之卿與下大夫一命。

畿內天子統治立三公。大師。大傅。大保。以論道經邦。九卿。卽少師。少傅。少保。寅亮天工。與冢宰。司徒。宗伯。司馬。司空分掌六典者也。有二十七大夫。以服官政。有八十一元士。以理庶務。天子爲陽教之宗。陽敷始於三。終於九。三九故二十七。九九故八十一。自上倍而下者。職專則事簡。職卑則事煩也。王畿外公。侯。伯。子。男。各主其國。其臣各有卿。大夫。士。惟公。侯。大國得立三卿。皆上大夫也。皆命於天子。其下大夫五人。上

士二十七人也。次國亦三卿，惟二卿命於天子，一卿命於其君，大夫上士之數猶大國也。小國止二卿，天子不命，命於其君，大夫上士之數亦猶次國也。大國之卿皆命於天子者，大國勢重，必以天子命卿控制之。次國從省，小國勢輕，不用也。大夫無上者，天子之命卿，卽上大夫也。天子士稱元，元大也。士命於天子，無中下也。諸侯士未命，亦稱上，分中下而言也。上士二十七人，殺天子元士三之二也。若其中下士，則亦八十一人可也。蓋上士祿漸厚，其數宜減，中下士祿薄，可增也。前章云有中下士者，數各居其上之三分。



當在此節二十七人下亦謂八十一也天子使大夫  
爲三監監於方伯之國慮方伯在外專制一州其權  
太重二老遙制不及立監以監其國又慮一人孤二  
人各爲同異每國三人調停贊助無私蔽也使大夫  
者大夫卑於方伯不傷於陵奪也以四命之臣出監  
九命之伯王命重也後世以御史糾察外臣用此意  
天子畿內諸侯卽天子之公卿大夫士受地視外諸  
侯者也選賢者置之位則予之祿死則其子但得食  
父祿不嗣父位責得賢也外諸侯如公侯伯子男先  
世皆以有功分土列爵子孫無大惡均得嗣位以報

功也制謂章服與命數有制不得過也命陞級之命天子衣畫龍形袞然卷袞同周禮三公八命其服自鷩冕而下加一命則九命進服袞與天子同袞非臣子常服若有太功德加恩則賜之人臣之貴九命爲極王者之後上公與大國之公皆九命爵無過此者次國之君侯伯也不過七命小國之君子男也不過五命其冕服之等詳周禮司服之職

按公三卿九法乾陽之數易陽數至九而極二十七八十一後人附會耳世儒言易謂卦畫如根幹枝葉六畫上可增至無窮孟浪之說也公侯伯國三卿子

男獨二卿以國小也。然則大夫士亦宜殺之子男。既殺爲二卿則伯國亦宜殺之。卿大夫皆諸侯之臣亦莫非主臣也。命則皆命何獨卿。三卿何獨一卿不命。非所以布大公杜猜忌安寮窳也。既卿命於天子則是大夫以下皆不命可也。又云小國之卿與下大夫一命。此又誰命之。諸侯之國既有方伯正長統馭于州。又有天子命卿控制于國。方伯亦諸侯也。天子選於二百一十國之中。推此一人爲牧信任亦專矣。況其國既有命卿三人爲輔而又以三大夫監之。則其防之無異虎兕。此秦漢以後監軍之法。豈先王所以

親萬國推誠布公之道乎。畿內諸侯不得世爵。畿外諸侯享國繼世。是使內臣不如外臣也。如謂內諸侯不皆賢。外諸侯豈盡賢乎。如謂內諸侯卽天子公卿大夫宜選賢置位。有位卽有祿。不賢者旣不奪舊祿。則新進者又當益地。畿內地幾何足以供之手。旣云畿內以封王子弟。則王子弟爲內諸侯。皆不得嗣位乎。以經傳考之。周官有三孤。記無之。記有三公。周禮無之。周禮有六卿。記云九卿。記大夫士皆有常數。而周禮無數。周禮有袞冕鷩冕毳冕希冕玄冕。詩亦言袞衣毳衣。而記但言袞。周禮公之孤四命。記大國卿

不過三命周禮公侯伯之大夫子男之卿皆再命公侯伯之士子男之大夫皆一命記大國之下卿再命小國之卿與下大夫一命周禮六卿職官三百六十記公卿大夫元士僅得官百有二十大抵皆以臆裁非親見先王古制也鄭康成遂推此為夏禮以明堂位夏后氏官百為据夫明堂位亦記也其疑竇尤多烏足以相徵乎

凡官民材必先論之論辨然後使之任事然後爵之位定然後祿之爵人於朝與士共之刑人於市與衆棄之是故公家不畜刑人大夫弗養士遇之塗弗與言也屏

之四方唯其所之不及以政示弗故生也

論謂考其德行道藝也辨分明也使任以事也爵位次也謂初授以一命之位猶周禮一命受爵也祿食也爵人猶周禮鄉大夫三年大考其德行道藝而興賢能禮賓之鄉老及鄉大夫羣吏獻賢書于王王拜受之登于天府也所以者何朝者士之所會有德者士類所同欲爵以明其不私也刑人於市謂大辟也市者衆所聚也與衆棄之國人皆欲殺也公家不畜不容于國也此謂墨劓等刑人之未死者大夫不養不畱于家也屏之四方謂五刑宥而流者罪有輕重

流有遠近惟所當往之地置之虞書云五流有宅是也政以養民不及以政謂不授田不賑卹示不故欲其生也

按周禮掌戮之職墨者使守門劓者使守闕宮者使守內別者使守囿髡者使守積則是公家畜刑人與記言矛盾也而記爲近情周禮此言不可行也

諸侯之於天子也此年一小聘三年一大聘五年一朝天子五年一巡守歲二月東巡守至于岱宗柴而望祀山川觀諸侯問百年者就見之命大秦師陳詩以觀民風命市納賈以觀民之所好去聲惡去聲志淫好辟僻命典

禮考時月定日同律禮樂制度衣服正之山川神祇有不舉者爲不敬不敬者君削以地宗廟有不順者爲不孝不孝者君絀黜以爵變禮易樂者爲不從不從者君流革制度衣服者爲畔畔者君討有功德於民者加地進律五月南巡守至于南嶽如東巡守之禮八月西巡守至于西嶽如南巡守之禮十有一月北巡守至于北嶽如西巡守之禮歸假于祖禰用特天子將出類乎上帝宜乎社造乎禰諸侯將出宜乎社造乎禰

比年連年聘問也致問於天子也小聘使大夫大聘使卿朝諸侯親來朝也巡守天子親往巡諸侯所守



也。歲二月以下皆巡守之事。岱宗東嶽泰山東爲生  
物之始。故曰宗。柴燔柴天子至方嶽下則燔柴于山  
升煙祭天告至。一方山川神祇皆於此望而祭之。一  
方諸侯皆來觀。問高年百歲之人就見之。大師樂官  
采民間詩獻之。以觀風俗善惡也。命市官納市中物  
價以觀民好惡。民志奢淫則所好邪僻也。命典禮之  
官考曆以明四時及月之大小日之甲乙同齊也。律  
六律度量衡所由出也。解見書堯典禮冠昏喪祭之  
類。樂五聲八音之類。制度宮室車旗之類。衣服貴賤  
品級之類。正之使齊以同風俗也。山川神祇不舉。謂

廢祭祀也不順。如亂昭穆失時序之類。從猶順也。君皆謂諸侯有犯此者。天子削黜流討之也。進律升爵也。人與鬼神交曰假。祖祖廟。禰父廟。特一牲謂牛也。廟各用一牛。天子出巡守。征討也。諸侯出朝覲會同也。類祭天宜祭后土。造祭祖禰。皆將出而祭告之名。○按虞書三載考績論語亦云。三年有成。比及三年。則是考績之年。卽古述職之歲。述職之歲卽來朝之期也。故商頌云。歲事來辟。勿予禍誦。然則古諸侯朝天子述職。蓋三年一至。而天子適諸侯巡守。或五年耳。此云五年一朝。又云五年一巡守。或卽巡守而遠。

朝會于方獄不然則朝與巡守期併抑天子不巡守則來朝巡守則不來與或謂其間四年分諸侯爲四部遞朝四歲而徧虞書謂五載一巡守羣后四朝也或云虞夏五年一巡守殷六年周十二年鄭康成解周禮謂以遠近爲疏數四方六服各爲四部分四時應朝之年四時分至各以一歲徧紛紛皆異說也此節大抵據堯典敷衍不可以槩三代卽三代之法不可以槩後世必欲踵巡守行之是秦隋之覆轍也法有行千古而必不可通于後世者五年一巡守是也解見堯典大師陳詩蓋所至士民里巷謳歌有關風

化者采輯潤色之當世大師所弦歌非必即民間之作。後世遂謂國風爲里巷之曲亦讀禮之誤也。

天子無事與諸侯相見曰朝。考禮正刑一德以尊于天子。天子賜諸侯樂則以祝。唱六將之。賜伯子男樂則以鼗。將之。諸侯賜弓矢然後征。賜鈇鉞然後殺。賜圭瓚然後爲鬯。未賜圭瓚則賚鬯於天子。天子命之教然後爲學。小學在公宮南之左。大學在郊。天子曰辟雍。諸侯曰類。泮宮。天子將出征類乎上帝。宜乎社。造乎禘。禘馬怕反於所征之地。受命於祖。受成於學。出征執有罪。反釋奠于學。以訊馘。國告

天子無事。謂無凶喪戎寇之事。平世以吉禮朝諸侯也。考禮無違僭也。正刑無枉縱也。一德無貳心也。三者皆尊王之事。祝以木爲之。如桶而方。中有椎連底。撞之以始。衆音者也。鼗小鼓有柄。旁有耳。搖擊之以節樂者也。凡以物賜人。置其大者于地。而持其小者以將命。故賜樂將之以祝。鼗也。祝差大而鼗小。祝始而鼗終。故祝以命公侯。而鼗以命伯子男也。鈇。扎草刀。鈇。斧也。瓚。以金爲勺。宗廟獻酒之器。以玉爲柄。故曰圭瓚。天子圭瓚。諸侯璋瓚。半圭曰璋。鬯。酒名。周禮有鬱鬯。以秬黍釀酒。和之以香。曰鬱。其氣暢然曰鬯。

天子諸侯廟祭初獻裸尸用之諸侯有大功德天子  
賜之圭瓚則自爲鬯不然皆資鬯於天子學學宮小  
學庶人子弟之學大學國子之學公宮左國內也郊  
國外也小學在國近以便民大學在外遠以尊師在  
內者小所習近也在外者大所期遠也辟闢通開明  
也雍安和也頌之言班以班政教也或云辟璧也水  
環抱如璧也頌泮也水半璧也蓋因象取義爲名禡  
祭始造兵器者名蚩尤三苗之君不祥之器故祭曰  
禡罵也受命于祖告于祖廟稟命也受成于學告于  
先聖定謀也釋猶奠也釋芹藻奠幣帛無牲牢也訊

謂所獲敵人生口待訊問者也。馘殺敵人而割其左耳獻功也。武功告于學歸本文德也。

按孟子云諸侯朝于天子曰述職。述職者述所職也。無非事者此云無事相見曰朝。非名也。孔子云禮樂征伐自天子出。此不易之經。為諸侯有邊功。旌以弓矢委諸侯。使殺伐。假以鈇鉞。若謂一賜之後便專征伐。此五霸假為口實。大亂天下者也。說詳尚書西伯戡黎章疏。義引春秋晉文公公執衛侯歸京師。為不得鈇鉞不殺其誨盜尤甚。鈇鉞賜而諸侯皆可殺。何有于大夫。記如此類。為奔操九錫濫觴可刪也。酒稱

鬯取香氣充暢周禮有鬯人鬱人鄭氏謂秬黍釀酒  
曰鬯漢以鬱金之草然詩書但言鬯不言鬱恐鬱亦  
是醞釀濃厚意非必是草而雜記有鬯曰杵則鬱草  
也然亦當珍貴若云鬱金卽今薑黃何芳香之有或  
云不以物重其禮然禮器云諸侯相朝灌用鬯則諸  
侯用鬯者多若皆資于天子千八百國天子皆資鬯  
亦煩且褻矣何貴重之有其說難盡信教學不可一  
日廢諸侯待天子命之教然後爲學此語尤謬武功  
告于學因詩魯頌有獻囚獻誠語彼爲魯弱僖公脩  
學諷以武功云爾學宮之祭不見於詩書釋菜小禮



非所以告武功記言大抵附會耳

天子諸侯無事則歲三田一為乾干豆二為賓客三為

充君之庖無事而不田曰不敬田不以禮曰暴天物天

子不合圍諸侯不掩羣天子殺則下大綏舞諸侯殺則

下小綏大夫殺則止佐車佐車止則百姓田獵獾難入

祭魚然後虞人入澤梁豺祭獸然後田獵鳩化為鷹然

後設罝射羅草木零落然後入山林昆蟲未蟄不以火

田不麇迷不卵不殺胎不殀天不覆巢

歲三田謂春秋冬夏暑不田搏獸謂之田者禽獸害

田故除之也為乾豆謂乾其肉供祭祀之豆也為賓

客供燕饗也。充君庖備君膳也。不敬謂慢神忘賓也。不以禮謂取之無厭。如合圍掩羣之類。暴殄絕也。合圍而殺之。掩羣而取之。是暴殄天物也。大綏謂大旗垂綏也。獵必抗旗。偃旗止殺也。佐車驅逆之車。先尊後卑者。田獵之序也。百姓獵謂冬獵也。獮祭魚。十月也。始食曰祭。古者先祭後食。故謂始食爲祭。虞人掌澤梁之官。累石絕水。空其中取魚。曰梁。射祭獸。九月也。九月民間始獵。鳩布穀也。二月鷹化鳩。至八月鳩復化鷹。則鳥始成。可羅取也。羅之小者曰罽。昆。衆也。明也。昆蟲未伏。蟊不焚。萊而田。恐傷百蟲也。此以上

皆秋冬之事。麋獸子也。不不取也。此以下皆春夏之事。

按古天子田獵所以講武事。故周禮大司馬蒐以教振旅。苗以教芟舍。獮以治兵。狩以大閱。無事則爲田。獵有事則爲軍旅。孔子云。以不教民戰。是爲棄之。所以安不忘危之道也。若夫羞俎豆。備裘褐。虞衡之官。足以供之。是以魯人獵。鼓猶爲敝俗。豳風于貉。載績武功。車攻吉日。爲宣烈。中興五子之歌。垂戒史牒。狩郎焚丘。春秋致譏。孟子謂百姓聞車馬之音。疾首蹙額者。好田之謂也。治則獵非首務。亂則田爲禽荒。今

云無事不田謂之不敬過情之論也。周禮四時田。此云一歲三田。鄭氏推爲夏禮。誣也。其謂夏月不田。近之。易象云。東鄰殺牛。不如西鄰禴祭。周禮夏祭曰禴。以水淪菜而祭。四時惟夏祭薄。不用牲牢。故不田。獵或有之。下文亦云。天子祭歲一特三禘。禘豐而特儉。豈以特故廢一田與。又云。春特則不田。似又不在夏矣。皆不可曉。設爵羅以仲秋。鳩化鷹爲候。夏小正又云。鳩五月化鷹。驗之布穀。五月無聲。夏小正言爲然。五月鳥未成。則記言又誤矣。

豕宰制國用。必於歲之杪。杪五穀皆入。然後制國用。用

地小大視年之豐耗以三十年之通制國用量入以爲  
出祭用數之飭物喪三年不祭唯祭天地社稷爲越節  
而行事喪用三年之飭喪祭用不足曰暴有餘曰浩祭  
豐年不奢凶年不儉國無九年之蓄曰不足無六年之  
蓄曰急無三年之蓄曰國非其國也三年耕必有一年  
之食九年耕必有三年之食以三十年之通雖有凶旱  
水溢民無菜色然後天子食日舉以樂

冢宰百官之長國用重計故冢宰制之杪末也歲終  
稅皆入然後制來歲一年之用地有小大則物產有  
多寡年有豐耗則收入有盈縮視其年之所獲爲用

之差等大約以其所入析爲四分用其三而餘其一使三年餘一年之用三十年餘十年之用通融會計欲其如此量今歲之入爲來歲之出入多不過禮入少則從殺用不常而費重者莫如祭與喪每歲之祭取諸每歲通融量出之仞零數曰仞猶易筮法歸奇于扞考工記輪人以其圍之仞皆正數外所零鄭氏謂什之一是也祭吉禮喪凶禮故三年之喪除天地社稷外皆不祭卽以三年內不祭餘財供喪之用緇引柩大繩越緇違凶從吉也用不足則殘缺敗禮曰暴用有餘則泛濫沒禮曰浩豐年用仞不過禮故不

奢凶年量其仿以成禮故不儉蓋年有豐凶仿有多寡禮亦因之雜記謂凶年祀以下牲正此意所謂量入爲出三十年之通如是而後有九年之蓄也三十年爲一世世有餘蓄雖水旱何能困之菜色食菜之色言民無穀食也盛饌曰舉周禮膳夫之職五日一舉鼎十有二物皆有俎以樂侑食又曰大荒則不舉○按喪祭皆大禮皆至情禮則祭爲重情則喪爲切如以情三年不祭可也如以禮郊社越縉未爲不可而說者疑之嘗觀周書顧命成王初喪嗣君冕服受命見諸侯于內朝受珪幣乘黃而後釋冕反喪服此

非周召之禮與則祭天地越縞於何不可無已則初  
喪使人代雖廟祭亦可代也卒哭則墨衰行事雖廟  
祭亦可行也蓋先王制禮主于尊敬故曰知親而不  
知尊者禽獸也惟禽獸知愛不知敬故禮以節人情  
別于禽獸不以情損禮不以親加尊不以愛忘敬可  
知也故曾子問諸侯于天子崩君薨既殯五祀亦越  
縞行則天地社稷雖始死不廢可知蓋三年之喪在  
親則主哀而敬爲節在尊則主敬而哀爲節親喪則  
祭爲疏哀勝也尊喪則祭亦尊敬勝也可以達禮義  
矣



天子七日而殯七月而葬諸侯五日而殯五月而葬大夫士庶人三日而殯三月而葬三年之喪自天子達庶人縣玄封葬不爲雨止不封不樹喪不貳事自天子達於庶人喪從死者祭從生者支子不祭

人死而殮於棺曰殯殯而藏於土曰葬初死不卽殯不忍殯也殯不卽葬俟會者之至也尊者禮多故遲卑者禮少故速春秋傳云天子葬同軌畢至諸侯同盟至大夫同位至士外姻至三年之喪自天子達言下達於庶人也縣封謂以二絰懸棺下壙不用碑楹也不爲雨止屆期必葬雖雨不止也不封不培墳也

不樹不植木也以上四者皆庶人之禮葬不貳事哀  
慕專也王崩世子三年不言而諸侯以下可知大功  
廢業而三年之喪可知也喪從死者卽中庸篇父爲  
大夫子爲士葬以大夫祭以士之類從死者葬以安  
其分也從生者祭以伸其情也自天子下至庶人此  
禮同也支子不祭祭于宗子家也說詳曲禮

按七五等日月議禮者以數別尊卑云爾鄭謂尊者  
舒卑者速亦非截然定三五七之限也卻尸七日五  
日不就木則腐爲虐士而人畏之以此求生顧不害  
與不爲雨止因春秋書敬嬴定公之葬雨不克左公

羊誤以爲禮故記附會謂庶人與諸侯禮異也苟禮  
邪則春秋不書書雨不克葬譏不戒也不爲雨止何  
獨庶人當爾不封不樹茫茫原野數世之後焉識丘  
隴喪不貳事以爲通禮則可以爲庶人之禮如解者  
所云則是士大夫親死皆墨衰經與于公門之事不  
可爲訓

天子七廟三昭三穆與大祖之廟而七諸侯五廟二昭  
二穆與大祖之廟而五大夫三廟一昭一穆與大祖之  
廟而三士一廟庶人祭於寢天子諸侯宗廟之祭春曰  
禘約夏曰禘秋曰嘗冬曰烝天子祭天地諸侯祭社稷

大夫祭五祀。天子祭天下名山大川。五嶽視三公，四瀆視諸侯。諸侯祭名山大川之在其地者。天子諸侯祭因國之在其地而無主後者。天子犴。特禘，禘祫嘗。祫烝。諸侯禘則不禘，禘則不嘗。嘗則不烝，烝則不禘。諸侯禘，一犴一祫。嘗祫烝禘，皆大牢。諸侯社稷，皆少牢。大夫士宗廟之祭，有田則祭，無田則薦。庶人春薦韭，夏薦麥，秋薦黍，冬薦稻。韭以卵，麥以魚，黍以豚，稻以鴈。祭天地之牛角，繭栗宗廟之牛角，握賓客之牛角。尺。諸侯無故不殺牛，大夫無故不殺羊，士無故不殺犬豕，庶人無故不食珍。庶羞不踰牲，燕衣不踰祭服，寢。

不踰廟

廟之言貌也。神貌也。身以上爲父祖。曾高四親。及始  
造命之君。爲大祖者。共廟。五四親而上。五服之外。親  
盡之祖。爲祧廟者。二祧者。超也。遙也。五廟與二祧共  
爲七。或曰。天子有二宗。與大祖之廟同。不毀。謂之世  
室。共七也。廟在王宮左。皆南向。各有門。堂寢室。週牆。  
大廟居北。中左三廟爲昭。右三廟爲穆。各以次疊而  
南。大廟則大祖居之。昭北一廟。二世君居之。穆北一  
廟。三世君居之。昭二廟。四世君居之。穆二廟。五世君  
居之。昭三廟。六世君居之。穆三廟。七世君居之。父居

昭則子居穆父子不共昭穆也。世遠廟數不足則新主祔于昭穆之南廟。而以盡北祧廟之主。遷于大祖廟之夾室。藏之餘三廟之主。以次自南升而北。昭升于昭穆。升于穆。左右不參也。廟皆南向。廟中主皆東向。祫祭則合羣主于大祖廟。惟大祖主東向自如。而羣主皆以南北爲左右。居左向陽爲昭。居右向陰爲穆也。諸侯五廟。謂四親與始封之祖爲五。大夫始祖卽諸侯之次子。始爵爲大夫者。與祖父之廟爲三。士止祭其父。爲一廟。庶人無廟。禮不下庶人。祭于寢。薦而已也。春祭曰禘。與禴同。薄也。春物初生。祭品薄也。

禘。帝祭。喪服小記大傳皆曰不王不禘。此以爲時祭之通名。未詳。而郊特牲又云春禘。近之。故雜記云夏而禘。自孟獻子始耳。學記云未卜禘不視學。天子視學亦以春也。嘗。百物秋熟可嘗也。烝。衆也。冬衆物皆備也。五祀。謂戶。竈。中。雷。門。行。也。五嶽。東岱。西華。南衡。北恆。中嵩也。四瀆。江淮河漢也。天子祭名山大川。以其能成變化。資財用。故報之也。上公之禮九牢。饗禮九獻。諸侯之禮七牢。饗禮七獻。視者。比其秩以祀之也。因國。謂國因其先代故墟。無主爲後。故祭之。天子祭無主之帝王。諸侯祭無主之諸侯。猶與特同。分祭

曰。牲合祭曰禘。天子宗廟四時之祭。春則就各廟特祭。夏則於大廟合祭。特祭禮儉。發生之時。不盡物也。合祭禮豐。物漸成。備物致享也。前節謂歲三田。或以此與。天子一時一祭。諸侯二時一祭。天子每歲三禘。諸侯再歲少一禘。禮殺於天子也。天子春特。夏卽禘。諸侯春特。夏祭猶未全用禘。備物後于天子也。牛羊豕具曰大牢。羊豕曰少牢。田采地也。祭與薦異。祭有常時。薦無定期。祭有尸。薦無尸。祭有牲牢。薦惟時物。春韭。長而卵生。夏麥成而魚出。秋黍熟而豚肥。冬稻登而鴈來。各以時薦也。小豕曰豚。牛角如蠶。蘭栗實。



者。犢也。角一手可握。長不出四指者。亦小牛也。角盈尺者。大牛也。牛用小。貴其初也。故以祭天地。殺牲所以供鼎實。鼎非常用之器。無大禮則不殺。珍美味。八珍見內則。庶羞亦以肉爲之。如牲爲羊。則羞不得更用牛之類。

按廟制祭名。諸說紛紛不齊。七廟不見於詩書。孔書云。七世之廟。非必真伊尹語。儀禮周禮穀梁家語等書。大抵與記先後雜出。未可相徵。或稱虞夏五廟。殷六廟。周七廟。或云九廟。以至於士一廟。祭法又云。適士二廟。官士一廟。未知誰是。夫尊祖敬宗。人有同心。

天子道隆位尊何以恩窮七世諸侯五世上不得伸  
情大夫祭不得越禘祖士庶人則并王父母不得祭  
豈人情乎。秋嘗冬烝名義稱矣。春杓夏禘于義何居  
又有謂夏禴者。有謂春祠者。有謂春禘者。有謂禘爲  
大祭。五年一禘。三年一禘者。又有謂禘卽禘者。今言  
禘禘亦時舉。又安在其爲大祭也。或謂三年喪畢。祔  
新主于廟。合羣主而祭之曰禘。引春秋所書羣公之  
祭以求三年五年之例。夫魯祭非禮。凡春秋所書皆  
爲失禮。豈可以爲質。故謂禘爲三年喪畢之祭。亦強  
說也。謂禘卽禘者。近之。但不定五年三年。恐亦當歲

一舉舉則當以春。此謂夏禘者。據春秋僖公八年秋七月禘大廟而不知正以失時書。故雜記云七月禘。孟獻子爲之非古也。禘本王者大祭。魯用之春秋非之。論語譏之。其重可知。蓋禘祭帝也。三王始祖皆帝子。故祀始祖所自出皆謂禘。其追崇遠。故其禮大。以大祖爲配。而羣廟之主皆從。故又曰禘。按商頌長發爲大禘之歌。而相土以下。迄于伊尹。皆在周頌雍爲大禘。而烈考文母皆在。是其徵也。諸侯祔則不禘。禘則不嘗。嘗則不烝。鄭謂四時缺一祭者。諸侯每歲分四時朝王。故缺一也。四時分朝之說。經無明据。卽周

禮亦鄭以臆解記則未及苟四時有常祭君朝可無攝乎。卽朝廢一祭耳。據此文是廢二祭也。中庸稱春秋脩其祖廟。又云禘嘗以祀其先。曾子問亦云嘗禘郊社尊無二上。祭義祭統祇云春禘秋嘗。然則一歲二祭。禮與大抵記作于經。廢之後耳。食舊聞不能折衷。解者必欲強合。辭窮則推殷夏記于周。且茫然何論殷夏乎。學者通其義可矣。

古者公田藉而不稅。市廛而不稅。關譏而不征。林麓川澤以時入而不禁。夫圭田無征。用民之力。歲不過三日。田里不粥。音育墓地不請。

公田公家之田如井田中畝是也藉借民力耕獲也  
不稅不賦其私田也廛市居之地民授以市地一區  
不責稅也關境上及要路之門譏察姦宄也不征不  
稅商旅也山林曰麓以時入不伐其生長也不禁與  
民同利也圭田祭田也圭錡通潔也與士虞哀辭孝  
子圭爲之圭同夫語辭凡大夫士在官則有祭田不  
征稅也用民之力謂興作之類每歲一夫役不過三  
日古者民田皆公家分授故禁不得私賣凡墓地聚  
族而葬外人不得請求也

按不稅不征不禁與孟子合其義甚正周禮司關市

虞皆有征山林川澤皆有厲禁此春秋戰國以來苟  
且一切之計不可為訓而鄭氏動推殷禮何知殷有  
此禮乎周用民力以下三事皆古良法然今亦不可  
盡行矣

司空執度度

鐸

地居民山川沮

聲

去

澤時四時量地遠

近興事任力凡使民任老者之事食

嗣

壯者之食凡居

民材必因天地寒煖燥濕廣谷大川異制民生其間者

異俗剛柔輕重遲速異齊

去聲

五味異和

去聲

器械異制衣

服異宜脩其教不易其俗齊其政不易其宜中國戎夷  
五方之民皆有性也不可推移東方曰夷被髮文身有

不火食者矣南方曰蠻雕題交趾有不火食者矣西方  
曰戎被髮衣皮有不粒食者矣北方曰狄衣羽毛穴居  
有不粒食者矣中國夷蠻戎狄皆有安居和味宜服利  
用備器五方之民言語不通嗜欲不同達其志通其欲  
東方曰寄南方曰象西方曰狄鞮低北方曰譯凡居民  
量地以制邑度地以居民地邑民居必參相得也無曠  
土無游民食節事時民咸安其居樂事勸功尊君親上  
然後興學

此節言聖人治天下因民宜俗裁成輔相使各安其  
所而後政教可施卽孟子告梁王使民養生喪死無

憾王道之始之意民生莫大於水土故居民必首司  
空唐虞之官莫重於司空司空者百揆也故舜禹居  
之以相堯舜平成而有天下空者四方上下總名洪  
水昏墊欲消去之故曰司空有變理參贊之道而後  
司空之職可舉故周禮以司空散見於五官而寓水  
德於冢宰記未識此意也度丈尺也度地居民草昧  
之初度地授田爲城郭宮室以安民也沮下濕之地  
水所聚曰澤地氣有燥濕天時有早晚量地因時以  
舉事役民老者之事事少也壯者之食食多也居民  
材謂調理區別各盡其材凡民資生利用曰材裁成



輔相使安生樂業曰居。因天地氣候相山川形勢順  
五方風俗隨民生稟賦五味謂酸苦辛鹹甘器械如  
水陸舟車之類衣服如毳皮葛越之類教如三綱五  
常之類政如禮樂刑政之類風俗通曰夷者箴也蠻  
者慢也戎者兇也狄者僻也文身畫身也雕題刺額  
也交趾兩足向內行也不火食東南氣煖也不粒食  
北方地寒無五穀也中國四裔雖不同而居服器用  
各有宜聖人皆欲通其意達其志故有寄象鞮譯之  
設寄寓也寄託其意也象彷彿其似也鞮履也因履  
以通意周禮有鞮履氏以通其聲歌是也或曰狄遠

也。鞮履也。遠履其事，知其意所在也。譯釋也。以彼此言語文字相解釋也。此以上皆王者同民一俗柔遠能邇之道。所謂居民材也。量地之便利爲國邑，度邑之大小居編氓，必使邑有可居之地，地有安居之民，民有可耕之地，三者相得，則土無閒曠，民無游惰，食以節用，以時安生，樂業然後教化可興也。

按司空卽唐虞氏之百揆。舜禹以司空總百揆，有聖人參贊位育，平成天地之能，然後此職克舉。空者六虛之名，昏墊不開，聖人欲銷之，乃命司空。洪荒之事無大于水土，故宮莫重于司空。後世水平土平司空。

職降而爲國邑始與五官并矣此節論居民材以天地山川內夏外夷裁成輔相盡屬司空故知司空重也周禮以司空考五官縱橫名法之家其於聖人典禮未必合然亦非苟且闕畧不備之書王制成于漢初周禮未出意緒不相接而世儒欲執王制討周禮謂司空水土職錯入司徒斥考工爲補闕今按王制言居材者變通利民之意與司徒土圭土會土均法原不相涉王制言司空典而正周禮言司空詭而奇迥不同不相爲謀牽強附合是學禮者之病也  
司徒脩六禮以節民性明七教以興民德齊八政以防

淫一道德以同俗養耆老以致孝恤孤獨以逮不足上  
賢以崇德簡不肖以絀惡命鄉簡不帥教者以告句耆  
老皆朝于庠元日習射上功習鄉上齒大司徒帥國之  
俊士與執事焉不變命國之右鄉簡不帥教者移之左  
命國之左鄉簡不帥教者移之右如初禮不變移之郊  
如初禮不變移之遂如初禮不變屏丙之遠方終身不  
齒命鄉論秀士升之司徒曰選去士司徒論選士之秀  
者而升之學曰俊士升於司徒者不征於鄉升於學者  
不征於司徒曰造士樂正崇四術立四教順先王詩書  
禮樂以造士春秋教以禮樂冬夏教以詩書王太子王

子羣后之天子卿大夫元士之適子國之後選皆造焉  
凡入學以齒將出學小胥大胥小樂正簡不帥教者以  
告于大樂正大樂正以告于王王命三公九卿大夫元  
士皆入學不變王親視學不變王三日不舉屏之遠方  
西方曰棘東方曰寄終身不齒大樂正論造士之秀者  
以告于王而升諸司馬曰進士司馬辨論官材論進士  
之賢者以告於王而定其論論定然後官之任官然後  
爵之位定然後祿之大夫廢其事終身不仕死以士禮  
葬之有發則命大司徒教士以車甲凡執技論力適四  
方羸力果反股肱決射御凡執技以事上者祝史射御醫

士及百工。凡執技以事上者。不貳事。不移官。出鄉不與  
士齒。仕於家者。出鄉不與士齒。

此記鄉國學教士之法。司徒。天子之卿。掌邦教者也。  
六禮七教八政。詳篇末。皆道德之目。淫。放。溢也。禮教  
政。所以施於民。養老恤孤。所以身先於君也。上。進也。  
簡。猶汰也。帥。率同。從也。賢。如下文。選士俊士之類。不  
肖。卽下文。不帥。不變之類。紂黜。通命。大司徒命也。周  
禮。天子畿內六鄉。萬二千五百人。爲鄉。每歲終。鄉大  
夫。簡鄉子弟。不帥教者。告于大司徒也。耆老。鄉縉紳  
告老者。朝會也。庠。鄉學也。元日。猶吉日。蓋次辛之正。

月吉日習射上功。謂行鄉射禮以中多爲上。尊德藝以示不帥者也。習鄉上齒。謂行鄉飲禮以年齒爲上。崇禮讓以示不帥者也。國之俊士士之已升于國學者。使與于射飲之執事。示不帥者向慕思齊也。不變。謂三年之終。又簡不帥。左右更移。新其師友之功也。如初禮。謂四年正月之吉。鄉大夫又習射飲于庠。如初教之不變。五年終。又簡不帥。移之郊。畿外百里。郊學也。鄉大夫又習禮于郊。教之如初。不變。謂七年終。又簡移之遂。遂學在郊外。漸遠也。八年正月。鄉大夫又習禮于遂。教之如初。又不變。則九年矣。是終不帥。

矣。然後乃屏棄之遠方，永不序用也。齒序也。此皆所謂簡不肖以紕惡也。每三年大比，司徒命鄉大夫論其鄉庠子弟之秀出者，辨別比儼曰論，頴銳出類曰秀，算數備用曰選，才過千人曰俊。由鄉大夫論而升之大司徒者，是謂鄉之選士；由大司徒再論而升之國學者，是謂大司徒之俊士。國學收而造就之者，是謂國學之造士。造成告于王，而升之大司馬者，是謂大樂正之進士。名雖有五士，皆一人不征，謂免其徭役，升於司徒者，不給役於鄉大夫；升於國學者，不給役於大司徒。造猶作養也，不以他事分其志，不以勞



賤屈其體所以優養其德行而閑習其道藝故曰造  
士此皆所謂上賢以崇德皆鄉學教人之法也樂正  
崇四術以下又國學教人之法也樂正典樂之官掌  
教國子虞書曰夔命汝典樂教胄子周禮大司樂掌  
成均之法以教國子卽今之祭酒子云成於樂世胄  
之子矜貴難化必教之使從容和順故曰司樂術路  
也詩書禮樂四者以爲入德之路曰術以爲課程之  
規曰教禮樂必趨踰舞蹈於春秋清和時習之誦詩  
讀書於冬夏寒暑時習之禮樂有聲容以馴擾其氣  
質詩書有義理以開牖其性靈皆所以柔其驕貴之

氣振其怠惰之習也。王太子王冢嗣。王子王庶子羣。后諸侯國之俊選。司徒所升之士也。士有貴賤入學。皆以長幼。幼雖貴必後。長雖賤必先。蓋俊選之士。皆已有德藝。與國子齒。非亢而且教國子敦讓也。此國學上賢崇德之事。將出學以下。國學簡不肖。黜惡之事。出學。謂九年之期。七年小成。九年大成也。小胥大胥。小樂正皆大樂正之屬。詳周禮。不帥教。謂王太子以下。至元士適子。而國之俊秀不與矣。王命公卿大夫士入學。謂習禮以教之。使變不變。王親臨視。又習禮以教之。又不變。則終不變矣。王三日不舉。減膳去。

樂憂羣子之不肖也。屏之遠方，亦謂王太子以下至元士適子。國之俊秀不與矣。古帝王公教誨不私其子，所以師嚴道尊而人莫敢不從。西方曰棘，急也。望其急變也。東方曰寄寓也。望其終歸也。終不變則亦終身不齒。如朱均不肖，堯舜且廢之。太甲不順，伊尹且放之。皆用此意而可知矣。此以上國學簡不肖，絀惡之事。造士謂鄉之選俊與王侯公卿元士之子皆是。大樂正論其德藝秀出者，告于王而升其人于司馬。曰：進士言皆可進受爵祿之士也。司馬：天子之卿掌爵祿。先王建官無偏任，養士無偏材。故司徒敷

文而車甲之教以聯司馬司馬訓戎而論士之典以兼司徒士有道德者必游於藝負材勇者必文以禮樂此先王所以設官用人隨試輒效也自司馬以下又明德藝之輕重見士不可苟試也進士皆可用而材器各殊必辯論其所官之材各署其所長告于王以俟王之定其論論定然後試以官如長於文事者使司教工於武畧者使治兵堪任此官然後命之爵爵則有位然後養以祿其慎重如此皆所謂上賢以崇德也而士猶有位至大夫廢職事者所謂有初鮮終功怠于宦成志驕于履滿故有敗人之軍師危人

之邦邑毀節改行寡廉鮮恥者終身不仕謂黜不  
復用死以士禮葬謂削其爵也此亦司馬黜惡之事  
有發謂有師旅徵發大司徒職掌教事故命大司徒  
教以車甲戰陳之方周禮居則爲比閭族黨州鄉大  
司徒統之出則爲伍兩卒旅師軍大司馬帥之兵卽  
其民將卽其官故兵農文武兼資內政外令相爲表  
裏也古之爲士者雖不遺材技武勇而司徒所教司  
馬所論道德爲先凡士執技論力如材官勇士使之  
行役四方擐衣佩臂執射御決勝負而從容道德非  
其事矣祝史皆事神之役技方有定局故事不二守

藝以爲職。故官不遷。在鄉或混于士類。在國則俊選所不與齒也。此輩若不仕于王朝。而或仕于大夫之家。雖在國亦不得與士齒。蓋勵爲士者以遠大貴德。賤藝非爲官。不達而不與之齒也。仲由冉求不亦仕於大夫之家。彼固道德之士。生不逢時。龍蛇之蟄。以安身不可同年而語矣。

按此節論造士用人。先王良法美意。藹然郊遂。雖遠亦各有學。以取賢斂材。文王世子云。郊人者遠之于成均。不得取爵于上尊耳。卽執技事上者。不與士齒之意。非終棄之也。司徒司馬官事相聯。自古爲然。管

子寄軍令於內政周禮司馬伍兩卒旅寓於司徒六  
官之屬惟司徒居多意蓋本此顧其謀主富強而九  
年教士上賢簡不肖之政缺焉王制雖司馬不過論  
材爵人右武而賤功所以爲六經之治說者多引周  
禮討王制左矣

司寇正刑明辟以聽獄訟必三刺有旨無簡不聽附從  
輕赦從重凡制五刑必卽天句論郵罰麗於事凡聽五  
刑之訟必原於父子之親立君臣之義以權之意論輕  
重之序慎測淺深之量以別之悉其聰明致其忠愛以  
盡之疑獄汜與衆共之衆疑赦之必察小大之比以

成之。成獄辭。史以獄成告於正。正聽之。正以獄成告于大司寇。大司寇聽之。棘木之下。大司寇以獄之成告於王。王命三公參聽之。三公以獄之成告於王。王三又。然後制刑。凡作刑罰。輕無赦刑者。例也。例者成也。一成而不可變。故君子盡心焉。

司寇。天子之卿。掌邦禁者也。刑以禁寇。故曰司寇。正刑。正定刑書。辟。法也。明辟。脩明法律也。言于公庭曰訟。拘于圜圜曰獄。聽猶斷也。聽訟而斷其曲直。有罪當殺者。訊之羣臣。訊之羣吏。訊之萬民。是謂三刺。諸大夫左右國人皆曰可殺。然後殺之也。有旨無簡。謂



但有發露之微旨無簡覈之實迹則不可輕聽斷於是乃有附赦之法比例無正條曰附從輕謂事可疑而法難縱如附以重罪則過嚴故從輕以防寃也釋囚曰赦從重謂雖無實而罪狀已著如以爲輕舍之則人易犯故依律從重赦之以明法也蓋入刑者必減等而赦則不須議減直指其所應得之罪耳制猶決也五刑謂肉刑墨劓宮刑大辟本三苗之法舜省爲五流後世又襲川至漢文帝始除之五刑嚴重聽斷不可有毫髮私意惟天至公至明卽天心與天一也論郵論其所犯之過尤郵尤同過也罰罰贖也祥

刑曰五刑不簡正于五罰五罰不服正于五過麗于  
事謂五罰之等必與所犯之事相麗麗合也祥刑曰  
罰懲非死人極于病不可苟也五刑之訟謂犯五刑  
者之訟辭父子主親原者推其情君臣主義立者植  
其分權謂輕重不定之間酌其當或爲親而蒙罪雖  
重可輕或爲忍于親而犯法雖輕亦重蓋情關父子  
刑干天和故當權其情於常情之外也或爲忠君而  
蒙罪雖重可輕或敢於無君而得罪比常加倍蓋臣  
與君難論曲直又當權其義於常理之外也事有似  
重實輕似輕實重者据事則反失序惟論其犯法之

意或輕或重自脗合也情有似淺實深似深實淺者  
忽畧則混同必審慎推測得其隱伏之衷或淺或深  
其量自適中也悉聰明謂竭耳目之力聰以聽辭之  
遁屈明以觀色之慙沮然亦或有憊于威訥于辯不  
得盡辭者必推吾不忍不欺之心以致吾忠實惠愛  
之意使彼得盡吐其隱微疑滯之情如是庶無疑獄  
乎而猶或有疑者不敢遂恣意斷之於獨也汜廣也  
寬容舒徐以俟公論定疑將自明若衆人皆疑則真  
謂之疑獄矣如是而後赦焉赦之可也而人不知所  
犯何罪則赦者輕犯犯者望赦必察其所應得之罪

比以成之如小罪則按小辟以成其罪而赦其所爲  
小辟大罪則按大辟以成其罪而赦其所爲大辟赦  
之所以釋疑而成之所以明法也疑者旣赦無疑者  
成獄矣辭謂犯者所對之辭史掌文書獄吏也正聽  
訟之官士師之屬史錄犯者之辭告正正據辭決罪  
也棘木外朝左植九棘爲孤卿之位又當作宥臨刑  
王命三省一不識二過失三遺忘以此免之不可而  
後行刑蓋好生者天子之仁而誅暴者司寇之法也  
制刑猶行刑凡作刑罰以下申言立法之意作刑罰  
定律令也輕無赦輕易無言赦也赦則法不信而人

易犯惟其赦之也不輕故其成之也不苟惟其成之  
也不苟故其刑之也無寬不赦而後法信法信而後  
人不敢犯也。例形體也。獄具成刑猶四體具成形形  
成則不可毀刑成則不可變所謂輕無赦也。然則聽  
斷之際君子烏容不盡心乎。苟以輕赦之心聽之則  
出入遷變不可以爲例矣。盡心卽前三刺以下諸事  
析言破律亂名改作執左道以亂政殺作淫聲異服奇  
技奇器以疑衆殺行僞而堅言僞而辯學非而博順非  
而澤以疑衆殺假於鬼神時日卜筮以疑衆殺此四誅  
者不以聽凡執禁以齊衆不赦過有圭璧金璋不粥育

於市。命服命車。不粥於市。宗廟之器。不粥於市。犧牲不  
粥於市。戎器不粥於市。用器不中度。不粥於市。兵車不  
中度。不粥於市。布帛精麤。不中數。幅廣狹。不中量。不粥  
於市。錦文珠玉成器。不粥於市。衣服飲食。不粥於市。五  
穀不時。果實未熟。不粥於市。木不中伐。不粥於市。禽獸  
魚鼈。不中殺。不粥於市。關執禁以譏。禁異服。識異言。

承上而言先王所以制刑之本意。國以政爲紀。以衆  
爲基。國依衆立。衆以政齊。故禍莫大於疑衆。害莫惡  
於亂政。析文字以壞律令。亂名器以改制度。挾邪說  
以叛正道。三者皆亂政之事。左道猶言旁岐。凡避必

左易曰師左次不正相值曰左行偽而堅卽子云色取行違居之不疑孟子云居之似忠信自以爲是者也言偽而辯如鄒衍公孫龍蘇秦張儀之輩順非文過也澤光滑也彌縫滅迹貌假鬼神者巫術也假時日者星術也古之聖人用此以定衆志而奸人反假此以疑衆志凡此四誅者不復審聽決殺者也蓋罪有傷心之害刑有誅心之法王者所以一道德同風俗而著爲律令正惟此耳何待聽乎過雖可赦當其執禁而赦則法不信況已禁又犯不可言過矣故不赦此四殺十四事皆所謂執禁不赦者也粥賣也市

者。衆之所聚。卽奸之所伏。利之所歸。卽害之所生。故古者刑人必肆于市。禁令必嚴于市也。金璋以金飾璋。或云璽也。圭璧金璋。命服命車。廟器犧牲。皆非民所宜有。禁僭亂也。用器。民常用之器。如弓矢耒耜之類。不中法度。則不可用。布帛之數。謂升縷之多少。如朝服布十五升。斬衰布三升。齊衰布四升之類。升八十縷也。幅廣狹。謂布廣二尺二寸。帛廣二尺四寸。是爲中量也。錦文珠玉。成以爲器。禁奢靡也。衣服飲食。民各自力作。不以市。防民惰也。關。謂境上及要路之門。



按此節責識立法之意不赦過非仁人之言易曰赦過宥罪書曰眚災肆赦子云欲善而民善焉用殺四罪誠可誅然必曰殺之則今之爲士爲臣者無噍類矣十四弼誠可禁然必曰不赦則商賈販負之藏于市者寡矣故立法之意可深思而按法之條不可盡用也

大史典禮執簡記奉諱惡天子齊戒受諫司會以歲之成質於天子冢宰齊戒受質大樂正大司寇市三官以其成從質於天子大司徒大司馬大司空齊戒受質百官各以其成質於三官大司徒大司馬大司空以

百官之成質於天子百官齊戒受質然後休老勞農成歲事制國用

此節記古者天子納諫受成之事太史掌國之禮事執簡策以記君之言動歲終奉所記王之過失一歲中王所忌諱惡聞于王者臣不欲顯諍以彰君惡故書之簡以進天子齋心戒愆受之納諫也司會冢宰之屬掌財用之數歲計曰會月計曰要日計曰成歲終司會計冢宰所詔王一年財用之數質正于天子是冢宰所職掌故爲王受質考正其當否也齋戒重其事也大樂正與司徒掌教事凡禮樂一歲之用大

禮記卷之三十一 卷之三十一  
司徒當受之大司寇掌刑禁與大司馬戎政相通故  
大司寇一歲之會大司馬當受之司空掌國邑居四  
民故司市一歲之會大司空當受之三官謂大樂正  
大司寇司市也從從司會也司會佐冢宰逆羣吏而  
總其會也百官各以成質三官謂大司徒大司馬大  
司空三官也三官以百官之成質于玉王與三官平  
定其制以報于百官百官齋戒受之一歲之治工畢  
而來歲之經制復始休老勞農皆歲終民間之事如  
蜡祭飲酒之類

凡養老有虞氏以燕禮夏后氏以饗禮殷人以食禮

周人脩而兼用之五十養於鄉六十養於國七十養於  
學達於諸侯八十拜君命一坐再至瞽亦如之九十使  
人受五十異糧張六十宿肉七十貳膳八十常珍九十  
飲食不離寢膳飲從於遊可也六十歲制七十時制八  
十月制九十日脩唯絞父給聲去衾冒死而后制五十  
始衰六十非肉不飽七十非帛不煖八十非人不煖九  
十雖得人不煖矣五十杖於家六十杖於鄉七十杖於  
國八十杖於朝九十者天子欲有問焉則就其室以珍  
從七十不俟朝八十月告存九十日有秩五十不從力  
政六十不與去聲服戎七十不與賓客之事八十齊若喪

之事弗及也。五十而爵，六十不親學，七十致政，唯衰。惟  
麻爲喪。有虞氏養國老於上庠，養庶老於下庠。夏后氏  
養國老於東序，殷人養國老於西序，殷人養國老於右學，養  
庶老於左學。周人養國老於東膠，養庶老於虞庠。虞庠  
在國之西郊。有虞氏皇而祭，深衣而養老。夏后氏收而  
祭，燕衣而養老。殷人冔許而祭，緇衣而養老。周人冕而  
祭，玄衣而養老。凡三王養老，皆引年。八十者，一子不從  
政。九十者，其家不從政。廢疾，非人不養者，一人不從政。  
父母之喪，三年不從政。齊衰大功之喪，三月不從政。將  
徙於諸侯，三月不從政。自諸侯來徙，旬家期不從政。少

而無父者謂之孤。老而無子者謂之獨。老而無妻者謂之矜。鰥老而無夫者謂之寡。此四者天民之窮而無告者也。皆有常饑瘠。音聾跛。插上躄。壁斷者。侏儒。句百工各以其器食。用之。

註疏。養老有四。養三老五更一也。子孫死國難則養其父祖二也。養致仕之老三也。養庶人之老四也。天子諸侯有事於學則養老一歲凡七舉。四時四又春入學釋菜合舞。秋頒學合聲。季春大合樂。爲七燕之言安也。禮簡而行於寢。一獻畢皆坐飲至醉。饗之言向也。禮行於廟立而不坐。體薦而不食。爵盈而不飲。

獻畢而止。食有禮。食有燕。食以飯爲主。設酒而不飲。燕純用恩。有虞氏尚之。而禮未備。饗純用敬。夏后氏尚之。而情未洽。殷人酌恩與敬。用食設酒。以象饗。主。食以象燕。然質而少文。則恩與敬未伸。周人兼脩之。鄭云。春夏用燕。酒以養陽也。秋冬用食。飯以養陰也。五十養于鄉。鄉學也。六十養于國。國學也。七十養于學。亦國學也。一坐再至。謂君有賜。不能備禮。但一足。跪首再至地。以備再拜之數而已。九十不親拜。使人代拜。受之。糗糧也。宿肉。隔日預備也。美食曰膳。貳膳。有副貳。備乏也。常珍。常食珍味。不離寢。謂寢處有友。

以閣之飲食美善之食與飲漿隨行可也。制謂制送死之具。歲時月日殊者。年愈衰。備愈急。緩急以難易爲差。歲制謂棺不易。故歲制時謂一季衣物之難制者。必三月乃可辦。月制謂衣物一月可辦者。日脩謂已備者無事制作。惟日脩理使完整而已。絞所以斂尸束外者也。衾單被被長大而有裏曰衾。冒以韜尸死而后制也。九十者。天子欲有問。使人就其家。以珍從。謂以珍味遺之。致尊養也。七十不俟朝。謂致仕之老見於君。先衆人退。不俟朝禮畢也。八十者。君每月遣人告而撫存之。九十者。有常秩養之。力政力役之。



征賓客。跪拜之事。齊喪毀瘠之事。不親學。不從師也。唯衰麻爲喪。其他哭踊禮節。不責備也。庠序學膠。皆學宮名。膠。校也。鄭云。糾也。國老。公卿大夫之老。上庠。國學。庶老。民間無爵之老。下庠。鄉學。夏以東序爲國學。西序爲鄉學。尚左也。殷以右爲國學。左爲鄉學。尚右也。周建東膠于國東。爲國學。建虞庠于西郊。爲鄉學。亦尚左也。祭祀之冠。虞曰皇。夏曰收。殷曰鬯。周曰冕。深衣。說見深衣篇。燕衣。玄色。燕。玄鳥也。縞。絹白色。玄衣。緇衣。必言祭者。謂以祭冠爲養老之冠。重其禮也。引年。謂行養老之禮于學。則令國中之老。皆引述。

其年加存卹如下云。不從政有常餼是也。不從政不服公家之役也。徙謂新遷諸侯。謂諸侯之國畿內之民往徙也。自諸侯來徙居京師。其家期年不役。天民之窮猶言天所窮之民。常餼給以廩餼。有常數也。瘖者不能言。聾者不能聽。跛者一足廢。躄者兩足廢。斷者支節不完。侏儒者身短小。凡此殘廢之人。以給百工之用。隨其可用之器。以給之食。器謂器使。如國語云。使侏儒扶廬。矇矓循聲。聾聵司火之類。

按老老之禮。先王教民爲子弟孝弟之道也。三老五更。不見於詩書。行葦云。酌以大斗。以祈黃耆。此詩人

登歌恆語未可爲養老之徵。畿內畿外高年多矣。天子諸侯欲人人延之。膠庠飲食之日亦不足。且老者未必皆賢。賢者未必可賓。苟惟衰殘癘病。是尸是祝。而道德不足以爲儀表。學問不足以資經濟。如近世鄉飲酒。單適足以玷膠序而已。養不過三五人。而播棄者徧四境。惡在其爲能養。說莫善於孟子。謂伯夷太公二老歸周。文王養之。非有袒割牲。執醬而饋。執爵而醕之禮。惟制民田里。教之樹蓄。導其妻子。使養其老。故文王之民無凍餒之老。此之謂耳。孟子去古未遠。養老之說于斯爲正。王制作於漢文帝世。三老

五更禮至東京始行。四代帝王所以化民成俗之本。姑不在此。讀者識其孝弟忠厚之意而可矣。

道路男子由右。婦人由左。車從中央。父之齒隨行。兄之齒隨行。朋友不相踰。輕任并。重任分。斑白者不提挈。君子耆老不徒行。庶人耆老不徒食。

凡男女同塗。男由女右。女由男左。夾者中之適當處。鴈行并行稍後也。不相踰并行也。輕任并。謂兼任也。分析半也。君子耆老有爵者。行必有車。庶人耆老。民間之老。食必有肉。皆曰不徒。

大夫祭器不假。祭器未成。不造燕器。

大夫有田可祭則自爲祭器不假借於人凡造器先祭器後家器

方一里者爲田九百畝方十里者爲方一里者百爲田九萬畝方百里者爲方十里者百爲田九十萬畝方千里者爲方百里者百爲田九萬億畝

自此至終篇皆申言上文未詳之目此一節言九州田畝之數制祿分田之法周制六尺四寸爲步闕一步長一百步爲一畝長三百步爲三畝是爲一里四方長闊皆三百步是爲方一里以開方之法分之中間有田九百畝寬一里長十里爲田九百畝四方皆

十里是一百箇一里爲田九萬畝也一箇四方十里  
爲田九萬畝則十箇四方十里爲田九十萬畝一百  
箇四方十里爲田九百萬畝今言九十億是一億爲  
十萬也十億一十萬九百萬也然古或以萬  
萬爲億或以十萬爲億或以萬爲億不盡同也若以  
方百里爲田九十億畝推之當爲田九萬萬畝十萬  
爲億當云九千億畝耳今云九萬億誤也

自恆山至於南河千里而近自南河至於江千里而近  
自江至於衡山千里而遙自東河至於東海千里而遙  
自東河至於西河千里而近自西河至於流沙千里而

遙西不盡流沙南不盡衡山東不盡東海北不盡恆山  
凡四海之內斷長補短方三千里爲田八十萬億一萬  
億畝方百里者爲田九十億畝山陵林麓川澤溝瀆城  
郭宮室塗巷三分去聲上一其餘六十億畝

此明前文千里內曰甸外曰采曰流之制古者冀州  
爲帝都三面阻河故有東南西三河流沙一名居延  
澤不足曰近有餘曰遙九州之地自禹貢五服稱五  
千里周禮九服稱六千里秦漢以後開拓至萬里今  
據所記甸采流四方不過三千里蓋周衰以後之地  
方百里爲田九十億畝則方三千里當爲八萬一千

億畝云八十萬億零一萬億畝誤也

古者以周尺八尺爲步今以周尺六尺四寸爲步古者  
百畝當今東田百四十六畝三十步古者百里當今百  
二十一里六十步四尺二寸二分

此記分田定畝之法兩舉足爲一步卽今五尺爲一  
弓也古者步大而周尺最小每尺得今尺八寸古者  
以周八尺爲步是今六尺四寸也今以周尺六尺四  
寸爲步是今五尺一寸二分也古步比今步多出一  
尺二寸八分以此計之古者百畝當今東田百五十  
六畝二十五步一寸六分有奇記云百四十六畝有



禮記通解 卷五 三二  
奇誤也。東田卽詩云南東其畝。古帝都西北墾田偏  
在東南。周秦漢偏居西。中原稱東土。故云東田地勢  
西北高。東南下。故東南爲沃壤也。

方千里者爲方百里者百。封方百里者三十國。其餘方  
百里者七十。又封方七十里者六十。爲方百里者二十  
九。方十里者四十。其餘方百里者四十。方十里者六十  
又封方五十里者百二十。爲方百里者三十。其餘方百  
里者十。方十里者六十。名山大澤不以封。其餘以爲附  
庸。閒田諸侯之有功者取於閒田以祿之。其有削地者  
歸之閒田。

此申明前言九州每州凡二百一十國之數九州之地每州四方千里是一百箇方百里也內封公侯百里之國凡三十尚剩七十箇百里又封伯七十里之國六十占去二十九箇百里又四十箇十里也蓋以開方之法計之凡百里之國一爲十里之方百封七十里國一用十里之方四十九七十里之國二用十里之方九十八則一箇百里爲七十里之國二尚剩十里之方二然則二十箇七十里之國用百里之方十剩十里之方二十七十里之國六十用百里之方三十剩十里之方六十于前百里之方三十內用去

七十里之方六十。是用百里之方二十九。用十里之方四十。故剩百里之方四十。十里之方六十也。又以封五十里之國百二十者。蓋凡百里之方一。為五十里之方四。則十箇百里之方。為五十里之方四十。今封五十里國百二十。是用去百里之方三十。尚剩百里之方十。十里之方六十。以為附庸間田也。

天子之縣內方千里者。為方百里者百。封方百里者九。其餘方百里者九十一。又封方七十里者二十一。為方百里者十。方十里者二十九。其餘方百里者八十。方十里者七十一。又封方五十里者六十三。為方百里者十。

五方十里者七十五其餘方百里者六十四方十里者九十六

此申明前言天子縣內分封之數畿內地方千里爲方百里者百既封九箇方百里之國尚餘百里之方九十一又以封方七十里之國二十一者蓋百里之方十可爲七十里之國二十尚剩十里之方二十今以十里之方二十外取十里之方二十九添前成四十九又爲七十里之國一共前七十里之國二十一。通計用去百里之方十十里之方二十九尚剩方百里者八十方十里者七十一又封方五十里之國六

十三者蓋百里之方一。為方五十里之國四。則百里之方十。為五十里之國四十。又百里之方五。為方五十里之國二十。總為五十里之國六十。又封五十里之國三者。凡五十里國一。用十里之方二十五。三箇五十里之國。用十里之方七十五。是用方百里者一十五。方十里者七十五。剝方百里者六十四。方十里者九十六也。畿外封國多而餘地少者。欲廣封建之制於天下也。畿內封國少而餘地多者。備采邑之分於王朝也。

諸侯之下士祿食九人。中士食十八人。上士食三十六

人下大夫食七十二人卿食二百八十八人君食二千八百八十人次國之卿食二百一十六人君食二千一百六十人小國之卿食百四十四人君食千四百四十人

此申明前文下士視上農夫至君十卿祿之數

次國之卿命於其君者如小國之卿

此申明前文次國一卿命於其君之祿小國二卿皆命於其君也

天子之大夫爲三監監於諸侯之國者其祿視諸侯之卿其爵視次國之君其祿取之於方伯之地方伯爲朝

天子皆有湯沐之邑於天子之縣內視元士

此申明前文天子之大夫爲三監者之祿方伯八州之伯湯沐之邑爲有事入畿內暫止休沐而後入朝三監之祿取諸此邑

諸侯世子世國大夫不世爵使以德爵以功未賜爵視天子之元士以君其國諸侯之大夫不世爵祿

此申明前文內諸侯祿外諸侯嗣之義諸侯世子謂外諸侯之嫡子世國卽嗣也大夫天子之大夫亦謂其子卽內諸侯之子不世爵卽所謂祿也蓋天子之大夫擇有德而任之所以不世爵若外諸侯之爵其

先世有大功于國故世世同休然其嗣子繼立亦必  
稟天子賜策命乃得爵如先世不然其車服禮數惟  
視天子元士以君其國而已若夫諸侯之大夫不但  
不世爵亦不得世祿矣

六禮冠昏喪祭鄉相見七教父子兄弟夫婦君臣長幼  
朋友賓客八政飲食衣服事爲異別度量數制

此記篇首司徒設教之目六禮卽儀禮所載士冠士  
昏士喪特牲少牢饋食鄉飲酒士相見之類皆所以  
一民性也父子以下七者皆所以興民德也事爲謂  
百工技藝異別謂器械物價不齊之等度謂丈尺量



謂斗解數百十也制布帛廣狹也飲食一衣服二事  
爲三異別四度五量六數七制八皆所以防淫也